

LEWALITABA

Leselinyana la Lekhotla la Taolo ea Motlakase le Metsi Lesotho



TSE KA SEHLOOHONG:
LEWA e kenya
letsoho thibelong
ea botlokotsebe **4**

TSE KA HARE...

3 Bokamoso boo
lefapha la metsi bo le
tsoaretseng Lesotho

6 LEWA 'mokeng
oa Word Forum on
Energy Regulation

13 Lekhotla le khutlisetsa
kopo ea LEC ea Litheko
tsa motlakase morao



U tšoenyehile ka Phepelo ea Motlakase?

Hape le...

- *Likhakanyo tsa khokelo ea motlakase* • *Khokelo ea motlakase*
- *Khaolo ea phepelo ea motlakase* • *Khokelo*
- *Khaolo ea phepelo e bakiloeng ke bothata
ba marang-rang a LEC?*

Lekhotla la Taolo ea Motlakase le Metsi (LEWA) le hlahisitse litokomane tse 'maloa tseo ka tsona taolo ea motlakase e tlang ho phethahatsoa ka tsona. Ka hara tse ling, Lekhotla le hlahisitse tokomane ea Lipehelo tsa Boleng ba Litšebeletso le Phepelo ea Motlakase (Electricity Quality of Service and Supply Standards - QOSSS).

Tokomane ena molemo oa eona ke hore K'hamphani ea Motlakase (LEC) e fane ka litšebeletso e ipapisitse le lipehelo tse behiloeng tse kahar'a eona. LEC e lebelletsoe hore ebe e qalile ho kenya lipehelo tsena tšebetsong ho tloha ka Mphalane 2002.

*Molemong oa litšebeletso
tse phethahetseng holim'a
motlakase Lesotho.*





LEWALITABA

LEKHOTLA
LA TAOLO EA
MOTLAKASE LE METSI

7 Floor, Moposo House, Kingsway
Private Bag A315 • Maseru
Maseru • Lesotho
Tel: +266 22312479
Fax: +266 22315094
E-mail: secretary@lewa.org.ls
Website: www.lewa.org.ls

MOOKAMELI
Lebohang K. Moleko
Email: lkoleko@lewa.org.ls

MOOKAMELI OA LEFAPHA LA
LITABA TSA SECHABA
Shao Khatala
Email: skhatala@lewa.org.ls

OFISIRI EA LITABA TSA SECHABA
Sebusi Khanyela
Email: skhanyela@lewa.org.ls

LEWA LITABA ke leselinyana la Lekhotla
la Taolo ea Motlakase le Metsi. Le
hatisoa ka Senyesemane le Sesotho. Le
fuo batho bohle ba nang le thahasello
litabeng tsa Lekhotla.

Maikutlo a hlahang leselinyaneng ha
se a Lekhotla. Lipapatso tse hlahang
ka ho lona ha se tse supang maikutlo
a Lekhotla.

Litaba tse hlahang ka ho lona li ka
hatisoa ntle le tefello ha feela ho
ngoloa hore li tsoa ho LEWA LITABA.
Re ipiletsa hore batho ba eelloe hore
ho nka nakoana ho etsetsa, ho tlosa
le ho etsa liphetoho lethathamong la
batho ba fumanang LEWA LITABA.

Boqapi © LEWALITABA 2018

TSE KA HARE

MOLAETSA

ka Mookameli 2

BOKAMOSO BA LEFAPHA

la metsi Lesotho 3

LEWA THIBELONG EA

botlokotsebe 4

LEWA 'MOKENG

oa WFER 6

BOITHUTO KA LITHEKO

ba motlakase bo phethetsoe 7

MEKHOA EA HO TSITSISA

phepelo ea motlakase 8

LEKHOTLA LE TSOELAPELE HO THEHA LIKOMITI

ka boemeli ba sechaba literekeng 9

MALEBELA A TŠEBELISO

e ntle ea metsi 10

LEKHOTLA LINTLHENG

tse boitšireletso 12

LEKHOTLA LE KHUTLISETSA

kopo ea LEC morao 13

LIPEHELO TSA LEC TSA MANTLHA TSA HO LOKISA

mathata a marang-rang a motlakase 14



Babali ba khabane,

Re boetse rea le amohela leselinyaneng lena la pele la selemo sa 2018/19 la Lekhotla la Taolo ea Motlakase le Metsi Lesotho.

Ho thabisa pelo ea ka ruri ho arolelana le lona lintho tseo Lekhotla le ntseng le li etsa. Lethathamo lena la lietsahala le thathamisa ka botebo lintho tseo Lekhotla le li etsang ntlafatsong e lebisang hore Lesotho e be sebaka se khahlehang le ho akofa ka moruo.

Leselinyana lena le boela hape le fana ka tlhaloso ea ntlha tsa ntlafatso ea lefapha la metsi la Lesotho, boithukhubetso ba Lekhotla hammoho le Sepolesa sa Lesotho sa Maseru e ka thoko ho toropo toantšong ea litlolo tsa molao ka tšebeliso 'moho le sechaba, LEWA 'mokeng oa WFER, ho phetheloa hoa boithuto ba litheko tsa motlakase, le lipehelo tsa LEC tsa mantlha tsa ho rarolla mathata a marang-rang a motlakase, ha'ra tse ling.

Molaetsa ka Mookameli

Joaloka bolaoli, ke boikarabello ba rona ho netefatsa hore ntlafatso ea Lipehelo tsa Boleng ba Phano ea Litšebeliso lefapheng la metsi le motlakase li ea ntlafala. Ka ho etsa sena Lekhotla le hlahloba mekhoha eohle ea ntlafatso ea maano le liphetoho tse amanang le tsamaiso mekhahlelong eohle ea meralo. Temoho ea tsena tsohle e etsa hore 'Muso oa Lesotho o be le tšepo e sa thekeseleng ho Lekhotla ka ntlafatso, kanetso ea moruo le ho matlafatsa phano e teng ea litšebeliso bakeng la moloko oona le o tlang.

Lebitsong la Lekhotla, ke isa liteboho le tlotla ho Matona a matlafatsang tšebetso ea LEWA ka tiso ea makala a bona, e leng Lekala la Matla le bolepi, le bolaoling ba Mohlomphehi Hloalele Mokoto, le Lekala la Metsi, le bolaoling ba Mohlomphehi Samonyane Ntsekele ka tšebetso le tšebeliso 'moho e lebisang katlehisong e tsoileng matsoho ea Lekhotla.

Ke menyelletsa selelekela sena ka ho rapella Lekhotla hore le lule le phethahatsa mosebetsi oa lona oo le o tšepetsoeng, ka lipehelo tse tšoanang hantle le tsa machaba. E boetse ke ka tšepo e tiileng, re khothaletsang/lakatsang hore lik'hamphani tse boliseng ba rona li akofe moruong lilemong tse tlang, 'me sena se tla etsa hore boemo ba bophelo ba sechaba sa heso bo ntlafale ☐

Lebohang K. Moleko (Professor)
Chief Executive



Bokamoso ba lefapha la metsi Lesotho

Lekhotla la Taolo ea Motlakase le Metsi (LEWA) joaloka molula-qhooa phanong ea boleng ba litšebeletso le tiisetso ea phano ea metsi ka linako tsohle har'a tse ling, le ile la eletsa 'Muso oa Lesotho ka mekhoha eo phano ea litšebeletso tsa metsi li ka fihleloang ka ho khotsofatsa.

'Me seo se ntlafalitse phano le boleng ba lefapha la metsi. Lefapha la Metsi Lesotho e sa le le hola 'me ho fihlela mothating oa kajeno le ntse le tsoela-pele ho hola. Taemane e metsi joalokaha e tloaetse ho boleloa e fana ka melemo e mengata haholo ea ntlafatso ho Basotho joaloka ntlafatso ea litsela le bophelo ba Basotho.

E le ho arabela leqemeng la metsi le bakoang ke kholo e holimo ea sechaba sa litoropo le pheto-phetoho ea leholimo, Lefapha la Metsi Lesotho le nkile mohato oa tharollo e le ho akofisa phano ea metsi.

Lekhotla le ke ntse letsoho le toma ho netefatseng ea hore phano le boleng bo tsoileng matsoho ea metsi e ea ntlafala, ka moralo o bitsoang, Ntlafatso ea Phano ea Metsi Mabalane (LLWSP). LLWSP ke morero oa ntlafatso o tlo arabela le ho ntlafatsa leqeme le teng la metsi metseng ea mabalane ho latela kholo e sekahla ea sechaba, 'me sena se etsoa ka tataiso ea Lekala la Lihloeliloeng. Porojeke ena e reretsoe ho fana ka metsi a hloekileng ka nako e telele ho litsi tse robong tse hloahiloeng. Porojeke ena ke ea nako e telele e reretsoeng ho fana ka tharollo ho tlhokahalo ea metsi ho fihlela ka selemo sa likete tse peli le mashome a mararo (2030) ho sechaba se 927,548. Porojeke ena e ipapisitse le lipehelo tsa Mongoaha-Khohlo oa bo-tšelela (Sustainable Development Goal-6), eo sepheo sa eona e leng ho fana ka *"Metsi a hloekileng le Tikoloho"* ho bohle ka selemo sa likete tse peli le mashome a mararo (2030). Litsi tse robong (9) tsa porojeke ea Ntlafatso ea Phano ea Metsi Mabalane ke tse latelang:

- **Sebaka sa pele (1):** Butha-Buthe, metsi a tla huloa nokeng ea Hololo.

- **Sebaka sa bobeli (2) le sa boraro (3):** Hlotse le Maputsoe. Metsi a tla huloa nokeng ea Leribe e pela ha Setene.
- **Sebaka sa bone (4) le sa bohlanano (5):** Maseru le mathoko a eona Roma, Mazenod, TY, Morija le Matsieng. Metsi a tla huloa nokeng ea Phuthiatsana.
- **Sebaka sa botšelela (6) le sa bosupa (7):** Mafeteng le Mohale's Hoek. Metsi a tla huloa nokeng ea Makhaleng.
- **Sebaka sa borobeli (8):** Quthing. Metsi a tla huloa nokeng ea Sebapala le Senqu.
- **Sebaka sa borobong (9):** Semonkong. Metsi a tla huloa nokeng ea Maletsunyane.

Sebaka sa bone le sa bohlanano tsona li se li le teng kaha li ile tsa ahoa ka potlako. 'Me letamo lena le hauoeng la Metolong le tlisitse phetoho ea e kholo phanong ea metsi a hloekileng le e khotsofatsang metseng ea mabalane □



Letamo la Metolong.

LEWA thibelong ea botlokotsebe

Ka la 09 Motšeanong 2018, Lekhotla la Taolo ea Motlakase le Metsi (LEWA) le ile la kenya letsoho ketekelong ea Mokete oa Selemo oa Thibelo ea Botlokotsebe ba keng sa Mahokela, mabaleng a Sekolo se Phahameng sa Christ the King, Roma. Mokete ona o ne o hlophisitsoe ke Sepolesa sa Lesotho (LMPS) sa Maseru e ka thoko ho teropo.

Ha a bula mokete, Senior Inspector Lithakong Ntlaba, o ile a hlalosa hore sepheo sa mokete ke ho khothatsa Mahokela le ho Metebo ea Sepolesa e boliseng ba metse e fapaneng. O boetse a hlalosa hore mokete o tsoaea mosebetsi o tsoileng matsoho oo metebo e fapaneng le Mahokela a eona a e entseng thibelong ea litlolo tsa molao kahara metse ea bona. O hlalositse hore mokete oona o tlo pepesa seo metebo ea Maseru e ka ntle ho toropo e ntseng thibelong le tharollong ea litlolo tsa molao sa selemo sa likete tse peli le leshome le metso e supileng (2017). “Ba sebelitseng hantle ba tla fumana likhau,” ho rialo Senior Inspector Ntlaba.

Lekhotla le ile la hlokomela ho le bohlokoa hore le kenye letsoho moketeng oona oa toantso le thibelo ea botlokotsebe kaha le ananela bohlokoa boo boipoleso

ba sechaba bo se etsang karolong ea polokeho ea maphelo le tikoloho. LEWA e hlokometse hore ka Mahokela, litlolo tse ngata tsa molao tse kenyelletsang boqhobane, qhalo ea kemaro, lintoa tsa malapeng, lipeto le bosholu ba liphoofole li ile tsa thibelo kaha sechaba ha se ka ba sa itheka moroalo ho ba karolo toantšong ea botlokotsebe.

LEWA e ne e ke ntse letsoho ka mokhoa oa chelete e kaalo ka likete tse supileng (M7000.00), mehope, likipa le likepisi. Metebo ea Sepolesa ea Maseru e ka ntle ho toropo e fumaneng limpho (ho qala ka oa pele ho isa ho oa boraro) e bile Mokhalinyane, Roma le Morija. Motsotso oona oa limpho e ile ea e ba oo batho bohle ba ileng ba ema ka maoto ‘me hoa utloahala melilietsane le meropa ea thabo. Sena e ile sa siea batho ba hlolletsoe ruri!

LEWA ka Monghali Shao Khatala, o ile a lebohela bohle ba neng ba le moo le ba atlehileng ho hapa. O ile a phaphatha Sepolesa sa Maseru e ka ntle ho toropo le Mahokela ka boiteko boo ba bo etsang toantsong ea botlokotsebe le hona ho fetisetsa matla sechabeng ka boiponeso ba metseng. O ile a boela a



Senior Inspector Lithakong Ntlaba.

hlalosa hore LEWA e tšoenyehile haholo ke tšenyō ea thepa e etsoang thepeng ea motlakase le metsi 'me a babatsa bohle ka thibelo ea litlolo tsa molao tse kang tseo. Monghali Khatala o ile a boela a thoholetsa metebo ea Sepolesa ea Maseru e ka thoko ho toropo e ipabotseng tšebetsong ea bona 'me a ba khothalletsa hore ba tšoare joalo. O ile a boela ka ho khetholoha ho leboha Inspector Pakiso Seqholo ka ho tliša morero oona o motle tlhokomelong ea LEWA.

"Kaha LEWA e le seleaneng sa moshoelella, Lekhotla le tla lula le sebetsa le lona ho tšireletsa khotso le polokeho ea naha," ho riatso Monghali Khatala.

Lintlha tse neng li hlaha ka sehloohong har'a metebo e neng e le moo li ne li kenyelletsa, tlhokahalo ea makoloi, litokomane tse nyamelang tsa linyeoe, meaho e tsofetseng ea metebo ea sepolesa le bosholu bo hloeleng setha ba liphoofolo. Bahlomphehi ba neng ba le teng moketeng oona e ne e le Morena oa Sehlooho oa Matsieng, Morena Seeiso Lerotholi, Morena oa Sehlooho oa Maama, Mofumahali Mabela Maama le Maseterata e Moholo oa Maseru, Mofumahali 'Matankiso Nthunya. Lekhotla le ne le emetsoe ke Monghali Shao Khatala, Mookameli oa Litaba tsa Baji le Lipuisano hammoho le Monghali Sebusi Khanyela, e le Raliphatlatlatso □



Moemeli oa LEWA Monghali Shao Khatala.



Boemeli ba Marena moketeng oa Mahokela.

LEWA 'mokeng oa WFER

Ka li 20 ho isa ho la 23 Motšeanong 2018- Lekhotla la Taolo ea Motlakase le Metsi (LEWA) le ile la kenela 'Moka oa Lefatše oa Taolo ea Matla oa Bosupa (World Forum for Energy Regulation- WFER) Mexico, Cancun.

Tsohle li ne li tšetšethoa holima 'moko-taba oa moka o re'ng, 'Taolo nakong ea ntlafatso ea marang-rang'. 'Moka oona o ne o reretsoe hore o thuse ho matlafatsa bohle ba neng ba le moo ka lintlha tse amanang le maano a bokamoso bakeng sa taolo/tsamaiso e tla ntšetsa-pele lefapha la taolo.

WFER ke 'moka oa machaba o nang le tsamaiso e tsoileng matsoho holim'a taolo ea matla, 'me ona o tsoaroa hang kamora lilemo tse 'ne. 'Moka oona o ne o hlophisitsoe ke Komishene ea Taolo ea Matla Mexico (CRE, ka lebitso la teng la Spanish) hammoho le Lekhotla la Machaba la Bolaoli ba Matla (international Confederation for Energy Regulators -ICER).



Molula-Setulo oa 'Moka Monghali Mr Guillermo Alcocer.

ICER ke eona e supang tsela le morethetho oa tšebetso holima maano a tsoileng matsoho ka hara taolo/botsamaisi ba lefatše.

'Moka oa WFER ke o mong oa e itlhommeng pele lefatšeng kaha e tšehetsoa ke barutehi ba likolo tse kholo, liqhoku tsa lefapha la matla, baetsi ba maano le botsamaisi ba maemo a holimo a matla holima maano a ntšetso-pele.

'Moka oona oa bosupa oa WFER o ne o le holima lintlha tse amanang le liphetofo tse ka atlehisang lefapha la matla lefatše ka bophara. Molemo oa 'moka oona e ne e le ho bonahatsa boiphihlelo le tema eo Mexico e e khathileng ho kenyeng maano a boemo bo holimo a matla.

Ka likhonthaletso tseo CRE e li entseng ka hara lefapha la matla, Mexico e bile mohlala le sethala se setle seo ka eona lefatše le neng le lokela ho ithuta ho tsoa ho lona ka lebaka la maano ao e a kentseng tšebetsong. E ne e le hore hape lefatše le ithute le hona ho nka malebala ka kholo ea sekhahla se holimo eo Mexico e e bontšitseng lefapheng la matla.

'Moka o ne o ile oa tšetšetha tse ling tsa lintlha tse kang, tlhahiso ea khase, tsamaiso ea mebaraka ea lefatše litabeng tse amanang le matla, boitlhopho ba balaoli ba matla ho liqholotso tse tisoang ke ntšetso-pele ea marang-rang le maano a ntšetso pele, le ho fana ka litšebeliso le ho sireletsa malapa a kojoana li mahetleng hore ba natefeloe ke tšebeliso ea matla.

Molula-setulo oa 'moka Monghali Guillermo Alcocer oa CRE, o ile a beha ka matla hore balaoli ba makhotla ba lokela ho akofela liphetofo tsa ngoaha ea mashome a mabeli a motso o mong (21st Century).

O ile a boela hape a hlalosa hore balaoli ba makhotla ba lokela ho imatlafatsa ka litsebo hore ba be le bokhoni ba ho rarolla mathata a ka hlahang botsamaising ea makhotla a bona le ho khotsofatsa bareki ba litšebeliso □

Boithuto ka theko tsa motlakase bo phethetsoe

Ka la 08 Tlhakubele 2018, Lekhotla la Taolo ea Motlakase le Metsi (LEWA) le ile la tsoara phutheho ea Boitlhahlobo ba Litheko (Cost of Service Study-CoSS) tsa motlakase tse hlophisitsoeng ke ba Sehlopha sa Lik'hamphani tsa MRC, Maseru Sun Cabanas. Phutheho ena e ne tsoaretsoe litsi le batho ba lefapha la motlakase.

CoSS e reretsoe ho hlakisa boemo ba khonahalo ea hore litheko tsa motlakase ho basebelisi ba oona e be tse nang le ponasetso ho mafapha ohle a amehang. Bo ne bo bontša hape mekhoha eo ka eona ho ka sebelisoang mofuta oa litheko tsa litefiso o sa khahlametsoang (cost reflective level) ho ntse ho shejoa hape le malapa a kojoana li mahetleng. Ba Sehlopha sa Lik'hamphani tsa MRC se neng se etsa mosebetsi ona oa CoSS ba ile ea bontša mekhoha e 'meli ea litheko tsa litefiso, e leng: litheko tsa litefiso tse sa khahlametsoang (cost reflective level) le litheko tsa litefiso tse khahlametsoang tsa litefiso (lifeline tariff). Ba hlalositse hore litefiso tsa litheko tse sa khahlametsoang e le mofuta oa litefiso o sa hlokeneng tlatsetso ea 'Muso 'me basebelisi ke bona ba lefang litjeo tsohle tse amanang le phano ea litšebeliso tsa motlakase. Ba Sehlopha sa Lik'hamphani tsa MRC ba boetse ba hlalosa hore mofuta oona oa litefiso tsa litheko tse sa khahlametsoang o khotalelitsoe khale hore o tle o kene tšebetsong ke Mokhatlo oa Ntšetso-pele ea Moruo Afrika e Boroa (Southern African Development Community SADC) ho tloha ka selemo sa likete tse peli le 'ne (2004). Tebello ke hore ka selemo sa likete tse peli le mashome a mabeli (2020) litho tsohle tsa SADC li be li le mokhahlelong ona. 'Me Lesotho joaloka setho sa SADC le ntse le ithophela/itokisetse mokhoa oona.

Puisanong e ikhethileng le LEWA, Dr. Moeketsi Mpholo oa Sehlopha sa Lik'hamphani tsa MRC, o ile a hlalosa hore mofuta oona oa litheko tsa litefiso tse sa khahlametsoang o ka tsoela naha ea Lesotho molemo kaha e tlosa boima ba ntlafatso/botseteli motlakaseng ho mokotla o moholo oa lichelete tsa naha. O ile a boela a re boitlhahlobo bona ba litheko bo kenyellatsa lintho tse kang, litefiso tse ka sebelisoang tsa nako e



Dr. Moeketsi Mpholo oa likh'amphane tse ikopantseng.

telele, mekhahlelo/maemo a basebelisi ba litšebeliso, netefatso e hlakisang boleng ba malapa a sa khoneng litheko tse teng tsa motlakase, sekala se hlakisang boemo ba LEC mabapi le tšebetso ea eona hammoho le 'motlolo oa ntlafatso o hlalosang ha ra tse ling, litheko, likhakanyo, boemo ba lichelete, litefiso le khahlamelo eo mekoloto e bang le eona.

"Litheko tsa litefiso tse sa khahlametsoang li na le khahlamelo e mpe haholo ho malapa a kojoana li mahetleng. Ka hona LEWA e ne e bontšoa mokhoa o mong oa litefiso, e leng litheko tsa litefiso tse khahlametsoang" a rialo Dr. Mpholo.

Litheko tsa litefiso tse khahlametsoang ke mofuta oa litefiso o khahlametsoang ke 'Muso ho mafapha fapaneng a basebelisi ba motlakase. Sena hangata se bonahatsoa ka litheko tse katlaase ho tsa litheko tsa litšebeliso. Mofuta oona oa litefiso tsa litheko o bohlokoa kaha o thusa hore malapa a fokolang a nolofalloe/natefelo ke tšebeliso ea motlakase. Bohle ba tla una molemo ho sena ke malapa a sebelisang motlakase o katlaase ho sekepele sa tšebeliso ea motlakase.

Phutheho ena e ne e atlehisitsoe ke baemeli ba lik'hamphani tse ka'ng, K'hamphani ea Motlakase Lesotho (LEC), K'hamphani ea Metsi le likhoerekhoere (WASCO), Metsi a Lihlaba tsa Lesotho, Banka e Kholo ea Naha (CBL) le Sekolo se Seholo sa Sechaba (NUL) □

Mekhoa ea ho tsitsisa phepelo ea motlakase

O mong oa mesebetsi ea Lekhotla la Taolo ea Motlakase le Metsi Lesotho LEWA) ho latela Molao oa Lesotho Electricity Authority Act 2002, o hlomathisitsoeng, ke ho bona hore motlakase o be teng kamehla e le hore o sebelisoe ke basebelisi ba oona (security of electricity supply).

Leha ele hore ha hona tlhaloso e akaretsang hore na ka “security of supply” ho boleloang, ho bonahala boholo ba batho bo lumellana ka lintlha tse itseng. Tsona ke hore kahar’a naha efe kapa efe, lefapha la motlakase le tsoanela ho etsa hore litsi tsohle tse lumelletsoeng ho sebetsa ka molao ho tloha ka tsa phehlo (generation), tsamaiso (transmission), qhalakanyo (distribution) le phepelo (supply) ea motlakase li etse bonnete ba hore kamehla le mehla ho basebelisi ba ona ba ea o fumana ha ba hloka ho o sebelisa.

E le ho fihlela sepheo sa molao o boletsoeng kaholimo, ka selemo sa 2016, Lekhotla le ile la phethela litokomane tse ‘ne ka sepheo sa ho thathamisa hore litsi tsohle tsa lefapha la motlakase li tle li nolofalloe ke tšebetso ea ho etsa hore naha e be le motlakase ka nako tsohle. Litokomane tsena ke Setšoantšo sa Laksense ea ho fehla Motlakase ka Matla a Inchafatsang, Laksense ea Phetiso ea motlakase ho tsoa litsing tsa phehlo. Tokomane e ‘ngoe ke Laksense ea ho Fepela Motlakase Likhoepong le Malapeng.

Leha litokomane tseo e se e le nakoana li le teng, ho bohlokoa hore re hopotse bohle ka bohlokoa ba tsona. Litokomane tsena li hlalosa ka botlalo hore batho kapa litsi tse ka khahloang ke ho tsetela mafapheng a khoebo ea motlakase ea phehlo, tsamaiso le phepelo ea motlakase ba tsoanela ho fihlela lipehelo lifeng.

Hajoale K’hamphani ea Lesotho ea Motlakase (LEC) e sa le eona feela e ntseng e e na le lengolo la tsamaiso le phepelo ea motlakase. Ntle le moo, Setsi sa Phehlo ea Motlakase se ‘Muela Butha-Buthe se na le tumello ea ho fehla motlakase. Empa bohle ba ka bang le bokhoni ba ho etsa o mong kapa kaofela ea mesebetsi ena ba lokolohile ho etsa likopo tse joalo.

LEC e sa le eona feela
e ntseng e e na le lengolo
la tsamaiso le phepelo
ea motlakase.

Litokomane tsena ke moloana ea LEWA eo ka eona batšeteli ba ka khahloang ba ts’oanelang ho e latela. Ka bokhutšoanyane, litokomane tseo ke tse latelang:

- Ea pele ke Laksense e bitsoang *Renewable Electricity Generation*. Kahar’a Laksense eo LEWA e hlalositse lipehelo tseo litsi/batho ba bacha ba fihlang lefapheng la phehlo ea motlakase ka matla a inchafatsang ba lokelang ho e latela nakong eo ba etsang likopo tsa tumello ea ho fehla motlakase kaha tumello e joalo e fanoa ke Lekhotla.
- Ea bobeli ke Laksense e bitsoang *Electricity Transmission*. Tokomane ena e hlalosa lipehelo tseo litsi/batho ba bacha ba fihlang lefapheng la phetiso ea motlakase ba lokelang ho e latela nakong eo ba etsang likopo tsa tumello ea ho fetisa motlakase ka likhoele tse kholo.
- Ea boraro ke Laksense e bitsoang *Electricity Distribution and Supply Licence Template*. Tokomane ena e hlalosa lipehelo tseo litsi/ batho ba bacha ba fihlang lefapheng la phepelo ea motlakase ba lokelang ho e latela nakong eo ba etsang likopo tsa tumello ea ho fepela sechaba ka motlakase ho Lekhotla.

Litokomane tsena ka boraro ba tsona li ka fumaneha websiteng ea LEWA leqephepeng la: <http://www.lewa.org.ls/licensing/template.php>.

Tokomane ea bone e bitsoa Standardised Power Purchase Agreement. Kahar’a tokomane ena, LEWA e hlalositse lipehelo tseo litsi /batho ba bacha ba fihlang lefapheng la motlakase ba ka kenang litumellanong tsa thekisetano ea motlakase le litsi tse kang LEC ☐

Lekhotla le tsoela-pele ho theha likomiti ka boemeli ba sechaba literekeng

Lekhotla la Taolo ea Motlakase le Metsi Lesotho (LEWA), le nkile mehato ea ho kopana le sechaba literekeng.

Moelelo oa likopano tsena ke ho tsebahatsa mesebetsi ea Lekhotla le ho ruta sechaba ka litaba tsa taolo ea metsi le motlakase.

Ele ho fihlela sena, Lekhotla le boetse la nka mehato ea ho fetela literekeng tse ling ho kopana le sechaba.

Joalokaha ho hlalositsoe leselinyaneng le fitileng, morero oa ho bopa likomiti literekeng, ke ho arolelana litaba tsa taolo ea litšebeletso le tse amang basebelisi ba litšebeletso.

Likomiti tsena li reretsoe hore li sebetse ele bakena lipakeng kapa ba fitisang melaetsa lipakeng tsa basebelisi le Molauli, molemong oa phano ea litšebeletso e tsoileng matsoho.

Likomiti li tla thusa hape ka hore li fane ka tlaheho ea phano ea litšebeletso literekeng, le ho ruta ba bang ka litokelo tsa bona litabeng tsa taolo.

Nakong ena ea tlaheho, Lekhotla le ile la bopa likomiti Leribe, Butha Buthe le Thaba-Tseka. Likomiti tsena li khethoa bokeng tsa sechaba 'me boemeli ba likomiti bo khethoa ke sechaba ka bo sona. Sena se etsoa ele mokhoa oa tšebetso o nang le ponaletso.

Lipitsong tsa sechaba, Lekhotla le ile la nka monyetla oa ho ruta sechaba ka tse amanang le litheko tsa metsi le motlakase, boleng ba phano ea litšebeletso, methati ea ho teka litletlebo le tse ling.

Lekhotla letla tsoela pele ho bopa likomiti literekeng tsohle. Morero ke hore ha taba ena e phethetsoe, likomiti li rupeloe ka botebo ka litaba tsa taolo ea litšebeletso tsa metsi le motlakase. 'Me ha thupelo ena ese e tšeroe, mosebetsi oa likomiti otlathakhoa ☐



E 'ngoe ea likopano tsa likomiti tsa LEWA literekeng.

Malebela a tšebeliso e ntle ea metsi

O mong oa mesebetsi ea Lekhotla la Taolo ea Motlakase le Metsi Lesotho (LEWA) ke ho etsa bonnete ba hore ho na le litšebeliso tsa metsi tse fumanehang, li bolokehile, li tsoile matsoho ebile li baballa metsi.

Ho fihlella boikarabelo bo bontšitsoeng kaholimo, LEWA e lakatsa ho ruta ba amehang ka malebela a ka sebelisoang, ka ho khetholoha nakong ena ea komello hore na metsi a ka sebelisoa hantle joang.

Tšebeliso e ntle ea metsi e ka hlaloso e le ho lekanyetsa metsi a hlokaalang bakeng sa mosebetsi o itseng le a sebelisitsoeng kapa a fanoeng. Basebelisi ba metsi ba khothaletsoa ho fetola mekhoha eo ba sebelisang metsi ka eona e le ho fokotsa tšenyoe ea metsi le ho khetha lisebelisoa tse baballang metsi. Ke boikarabelo ba motho e mong le e mong ho baballa metsi nakong ea lipula le ea komello.

Katlase mona ke a mang a malebela a tšebeliso e nepahetseng ea metsi.

Kamoreng e hlapelang

- Koala pompo ha u ntse u hlatsoa meno. Pompo e buletsoeng e ka senya metsi a fetang lilithara tse tšeletseng ka motsotso.
- Kenya lihlooa tsa lishaoara tse bolokang metsi ka kamoreng e hlapelang.
- Sebelisa shaoara bakeng sa ho hlapa ho e-na le ho hlapela ka bateng hobane hona ho ka boloka lilithara tse 20 ha ho sebelisoa shaoara.
- Ha u hlapela shaoareng, bulela pompo ha u itšela ka metsi 'meleng, u e koale ha u itšerama, ebe u e bulela hape ha u ipolisa.
- Se ke ua sebelisa ntloana joaloka sekoti sa lithole. Qoba ho bulela metsi ka ntloaneng leha ho sa hlokaale.
- Ha matsohana a bulelang metsi a karolo ea tanka ea ntloana a robehile, a etsa hore metsi a lule a e-tsoa nako tsohle, a lokise kapa u reke a mang.
- Lokisa matloana a lutlang. Tšela marotholi a fetolang 'mala oa lijo a leshome le metso e 'meli ka



Sebelisa hlohoana ea ho hlapela e le ho boloka metsi.

tankeng ea ntloana, 'me haeba 'mala o ka hlahella kahar'a sekoti sa ntloana kamor'a hora, tseba hore ntloana ea hau ea lutla.

Ka kicheneng

- Ho molemo ho noa metsi a kentsoeng ka sehatsetsing ho e-na le ho bulela pompo hofihlela ho tsoile metsi a pholileng.
- Inela lipitsa le lipane ho e-na le ho lula u buletse pompo ha u li hlatsoa.
- Sebelisa mochini o hlatsoang liaparo kapa lijana hafeela o tletse. U lokela ho reka mofuta o bolokang metsi ha u reka mochini o mocha.
- Ha u hlatsoa lijana ka matsoho, se ke ua tlohela pompo e butsoe ha u polisa. U ka baballa lilithara tse hlano ha u hlatsoetsa ka sekotlolong hofeta ha u buletse pompo.
- Hlatsoetsa meroho le litholoana kahar'a sekotlolo, eseng u bulele pompo.
- Se ke ua qhibilihisa nama kapa lijo tse ling tse nang le leqhoa la sehatsetsi ka metsi a pompo e buletsoeng. Qhibilihisa lijo bosiu kapa u sebelise sefuthumatsi.



> Jareteng

- Sebelisa metsi a litšila ho tšella lijalo.
- Sebelisa bolekaana bo tšellang kapa lethompo le sa ntšeng metsi haholo.
- Qoba ho tšella ha moea o le mongata kapa ha ho chesa. Ho tšella hoseng kapa mantsiboea ho etsa hore mobu o boloke mongobo.
- Tšella mohloa ha ho hloka hahala. Ha u tšella mohloa le lipalesa li tšelle hanngoe ka beke.
- Sebelisa lefielo eseng lethompo ha u fiela tseleng ea likoloi le ea maoto.

Ka kakaretso

- Lokisa lipompo tse lulang li lutla metsi. Pompo e lutlang e senya likete-kete tsa lilithara ka selemo.
- Sireletsa lipompo tsa metsi a chesang ka thepa e li sireletsang bakeng sa metsi ao a chesang le molemong oa ho boloka motlakase.
- Ruta bana hore ba koale lipompo hantle.
- Hlatsoa bana 'moho e le ho boloka metsi.
- Sebelisa nkho le seponche ha u hlatsoa koloi, eseng lethompo.
- Reka tanka ea metsi ho khakeletsa metsi a pula.

- Ha u hlatsoa koloi e tšele ka metsi kapele, ebe u sebelisa nkho ea metsi ho e hlatsoa, e-be u sebelisa lethompo ho e polisa.

U tseba joang ha ho e-na le moo ho lutlang?

- Ha litjeo tsa khoeli le khoeli li nyoloha (mithara o lula o sebetsa leha metsi a ntse a sa sebelisoa.
- Matheba-theba a mongobo maboteng.
- Gisara e lutlang.
- Ntloana e lutlang metsi.

Seo u lokelang ho se etsa ha u hlokomela ho lutla kapa ho phahloha ha lipeipi tsa metsi?

Letsetsa WASCO linomorong tsena: 22 313943/080022011

Etela liofisi tsa WASCO, u tlatse foromo ea litletlebo.

Haeba ho sa lokisoa:

- Letsetsa LEWA linomorong tsena: 223124 79
- Email: secretary@lewa.org.ls
- Etela liofisi tsa LEWA Moposo House, Mokatong oa bosupa, Maseru □



Ke 'nete hore motlakase o bohlokoa haholo mapheleng a rona ka kakaretso. Ho tloha nakong eo re tsohang, ho fihlela ha re robala, re sebelisa motlakase. Ka lebaka lena, ke ntho e sa makatseng hore re o sebelisa ntle le ho se nahane mathata a ka bakoang ke ho o sebelisa hampe, 'me oa hlahisa batho **kotsi** kapa hona ho ba bolaea.



Lekhotla la Taolo ea Motlakase le Metsi Lesotho

le na le bokirabello ba ho hlokomelisa sechaba ka tšebeletso e mope ea motlakase e ka bakang likotsi.

Lekhotla lintlheng tsa boitšereletso

Lekhotla la Taolo ea Motlakase le Metsi (Lekhotla) le rarolla litletlebo lipakeng tsa basebelisi ba litšebeletso le bafani ba litšebeletso moo teng ba fanang ka litšebeletso ba sa fanang ka tsona ba ipapisitse le lipehelo tse lokelang.

Ka ha ele boikarabello ba Lekhotla ho bona hore litšebeletso li fanoa ka tsela e bolokehileng, sechaba se lokela ho lula se hlokomelisoa ka lintho tse ka bang kotsi ho bona ele basebelisi.

Lekhotla le hlokomelisa sechaba ka lintlha tsena le ipapisitse le tseo li seng li hlokomelile. Ntlha e kholo e hlokomelileheng ke e amanang le meeli le marang-rang a ba fanang ka litšebeletso.

Ele mokhoa oa ho boloka likamano le ba fanang ka litšebeletso, basebelisi ba litšebeletso ba lokela ho qoba ho hahla eng kapa eng tlasa lithapo tsa motlakase kapa holima marang-rang a metsi le likhoere-khoere.

Taba ena ekaba kotsi ho motho ea etsang joalo, ba ikarabellang marang-rang a litšebeletso le ba bang. Motho ea etsang taba e boletsoeng ka holimo, o ipeha boemong boo eleng hore o tla sitoa ho sebelisa kapa hona ho lula sebakeng seo, kapa ebe o itima monyetla oa ho hokeloa metsi kapa motlakase.

Ho bohlokoa hape hore basebelisi ba litšebeletso tsa metsi le motlakase ba tsebe hantle hore ha tletlebo

ele ea litsekisano tsa mobu, Lekhotla ha lena matla a ho rarolla bothata bo joalo, 'me taba eo e lokela ho sebetsoa ke ba nang le tokelo ea ho etsa joalo. Lekhotla le ka atameloa ha tletlebo e amana le marang-rang a phano ea litšebeletso, 'me ho bonahala e ka baka kotsi. Thahasello ea Lekhotla tabeng ena ke ho bona hore hona le polokeho.

Lekhotla le tsebisa sechaba hape hore tšebetso ea Lekhotla ha e fetele likopong tsa lipuseletso tsa lichelete. Likopo tsa lipuseletso tsa chelete li lokela ho sebetsoa ke makhota a molao kapa mafapha a mang a nang le tokelo. Lekhotla le sebetse feela ka litletlebo tse amanang boleng ba phano ea litšebeletso tsa metsi le motlakase.

Ka hona, bohle ba khotaletsa ho ithuta ka botebo ka tšebetso ea Lekhotla le tšebetso ea ba fanang ka litšebeletso, 'me ka ho fitisisa ba ithute ka litokelo le boikarabello ba bona.

Litaba tsohle tsa phano ea litšebeletso li ka fumananoa K'hamphane ea Lesotho ea Motlakase (LEC) le ho K'hamphani ea Metsi le Likhoere-khoere (WASCO).

Ha ele litaba tse amanang le taolo ea litšebeletso tsena tsona li ka fumanaha liofising tsa Lekhotla kapa marang-rang a Lekhotla ho www.lewa.org.ls. Lipotso le litlatsetso li ka fitisetsoa ho secretary@lewa.org.ls. Mohala oa Lekhotla o na ke 00266 22 31 24 79 ■

Metsi ke bophelo!

Ha hole joalo, WASCO e ka se khaole litšebeletso nakong ea matsatsi a phomolo, Labohlano kapa mafelong a beke.



Lekhotla le khutlisetsa kopo ea LEC morao

Ka la 23 Pherekhong 2018, LEC e ile ea etsa kopo ho LEWA hore litheko tsa litšebeliso tsa motlakase (Energy Charges) le tsa Sekhahla se Phahameng sa Tšebeliso ea Motlakase (Maximum Demand Charges) li nyolloe ka linoko tse 23,2 lekholong (23.2%), mekhahlelong eohle ea basebelisi ba motlakase.

Ka nyollo ena LEC e ne e tla bokella chelete e M 1.04 billione, eo e neng e re e ea e hloka ho fana ka litšebeliso selemong sa 2018-19.

LEC e boletse hore a mang a mabaka a susumelitseng kopo ke a latelang:

- Theko ea motlakase (electricity bulk purchases) ho tsoa litsing tsa phehlo;

- Litšenyehelo tsa letsatsi le letsatsi tsa khoebo, tsa phehlo ea motlakase, mafura, meputso ea basebetsi le litjeo tsa laksense ea LEWA;
- Phaello thepeng (Return on Investment); le
- Theko ea thepa e ncha ho fetola ea khale (Depreciation).

Ho latela Molao oa LEA, oa 2002, o hlomathisitsoeng, LEWA e ile ea kopa LEC hore e hule kopo eo kaha e ne e na le lintlha tse ngata tse sa hlakang. Sena se bolela hore litheko tsa selemo sa 2017/18 ha li a ka tsa fetoloa ka nako e neng e lebeletsoe.

Lekhotla le ile la boela la hlokomelisa sechaba le basebelisi ba motlakase hore haeba ho ka ba le liphetofo ba tla tsebisoa ka methati e tla lateloa ☐

U na le thahasello ea ho tseba haholo ka
Lekhotla la Taolo ea Metsi le Motlakase?



Marangrang: www.lewa.org.ls

Ho fumana tlhakisetso e felletseng, ikopanye le rona:

Tel: +266 22 312479 Fax: +266 22 315094

Email: secretary@lewa.org.ls

Bala leselinyana la LEWA!



Lipehelo tsa LEC tsa mantlha tsa ho lokisa mathata a marang-rang a motlakase

Lekhotla la Taolo ea Motlakase le Metsi Lesotho (LEWA) le etsa bonnete ba hore litšebeliso tsohle tse fanoang ke Lik'hamphani tseo e li laolang li fanoa molemong oa baji, lik'hamphani, bo-ramatsete le 'Muso.

Ho na le litšebeliso tse 'maloa tse laolang mafapheng a motlakase, metsi le likhoere-khoere literopong. Lefapheng la Motlakase, litšebeliso tse laolang li kenyeletsa, phehlo ea motlakase (ka Setsi sa Phehlo ea Motlakase sa 'Muela se ikarabellang Metsing a Lihlaba), Phetiso le Phepelo (tse etsoang ke K'hamphani ea Lesotho ea Motlakase (LEC).

Lefapheng la Phepelo ea Motlakase (ESI), litšebeliso li lokela ho fanoa ka tsela e ipapisitseng le lipehelo tsa maemo a litšebeliso tse hlahang Tokomaneng ea Lipehelo tsa Boleng ba Litšebeliso tsa Phepelo ea Motlakase (QoSSS) tsa motlakase. Tokomane ea QoSSS ea motlakase e khakotsoe ke Lekhotla ka 2006. Lipehelo tsa litšebeliso tse tsoileng matsoho, ho ipapisitsoe le methati ea ho sebetsana le mathata a marang-rang a motlakase a LEC, ke lintlha tse hlalositsoeng kahar'a tokomane ea QoSSS e hlahang hakhutšoane katlase mona.

Tafoleng e katlase ho kenyelelitsoe litšebeliso tse hloailoeng le nako ea tšebetso e behetsoeng hore LEC e ipapise le eona. Tokomane ea QoSSS e thathamisitseng lipehelo tsena ka botlalo e ka fumaneha liofising tsa LEWA. Ntle ho moo, tokomane e felletseng ea QoSSS ea motlakase e ka fumaneha ho marang-rang a LEWA a latelang: <http://www.lewa.org.ls/standards/default.php>.

Boikemisetso ke hore ha ho fihletsoe katleho ea phano ea litaba e be ka 100% hobane mofani oa litšebeliso eleng LEC o lebeletsoe ho ruta basebelisi ka litšebeliso ka linako tsohle. Litšebeliso tse kang tsa nako ea ho khutlisetsa phepelo li behetsoe 90% ho ntse ho etsoe hloko hore ho ka ba le mathatanyana a sa lebelloang.

Ke boikarabelo ba LEC ho batalatsa mabala a puisano joaloka tšebeliso ea lihora tse 24 ea mohala le marang-rang molemong oa ho tlaheha mathata.

Lipehelo tsa mantlha tse tšetšethiloeng kaholimo li sebelisoa boemong bo tloaelehileng ba phano ea litšebeliso. Molaetsa oa bohlokoa mona ke hore k'hamphani e fanang ka litšebeliso e lokela ho leka ka mekhoha eohle ho qoba tšetiso ea litšebeliso □

TŠEBELETSO	LIPEHELO TSE LEBELETSOENG
Phumantšho ea litaba ho basebelisi mabapi le litsi tseo ho ka tlalehoang bothata ho tsona.	Litaba tse amang sebaka le lihora tsa ho etsa litlaleho litsing li fumantšoe basebelisi liofising tsa lik'hamphani tse fanang ka litšebeliso, libakeng tsa thekiso le litsing tsa phatlalatso tse kahare ho naha.
Mothati oa ho tlaheha bothata	K'hamphani e lokela ho fa mosebelisi ea tlahehang bothata nomoro ea tlaheho e khethehileng. Mosebelisi o lokela ho fana ka lintlha tse felletseng tsa boitsebiso.
Ho khaoha ha phepelo libakeng tse ngata (mohlomong naha ka bophara) hoa ka tšohanyetso	Linoko tse 30 lekholong (30%) tsa libaka tse bileng le tšetiso ea phepelo e khaohang ka tšohanyetso li lokela ho khutlisetsoa motlakase ka nako ea hora le halofo. Karolo ea linoko tse 60 lekholong (60%) tsa libaka tse bang le ho khaoha li tsoanela ho khutlisetsoa motlakase ka nako ea lihora tse tharo le halofo. Karolo ea linoko tse 90 lekholong 90% e be nako ea lihora tse supileng le halofo. Karolo ea linoko tse 100 lekholong ha (100%) e lokela ho ba nako ea lihora tse mashome a mabeli a metso e mene.
Ho khaoha hoa phepelo ho reriloeng	Ha ho khoneha, ho lokela ho fanoe ka tšebiso lihora tse 48 pele phepelo e khaoha. Moo ho amehang basebelisi ba bangata, LEC e lokela ho rerisana le basebelisi pele.
Nako ea ho khaoha hoa phepelo	Nako ea ho khaoha ha phepelo e reriloeng ha e-ea lokela ho feta lihora tse 8 boemong bohle ba motlakase le mefuteng eohle ea marang-rang.